

0.0.1 sīlasuttam

1. ye te bhikkhave bhikkhu sīlasampannā samādhi-sampannā paññāsampannā vimuttisampannā vimutti-ñāṇadassanasampannā. dassanampahaṃ¹ bhikkhave, tesam bhikkhūnaṃ bahukāraṃ² vadāmi. savanampahaṃ bhikkhave, tesam bhikkhūnaṃ bahukāraṃ vadāmi. upasaṅkamanampahaṃ bhikkhave, tesam bhikkhūnaṃ bahukāraṃ vadāmi. payirupāsanampahaṃ bhikkhave, tesam bhikkhūnaṃ bahukāraṃ vadāmi, anussatimpahaṃ bhikkhave tesam bhikkhūnaṃ bahukāraṃ vadāmi. anupabbajjampahaṃ bhikkhave tesam bhikkhūnaṃ bahukāraṃ vadāmi. taṃ kissa hetu: tathārūpānaṃ bhikkhave bhikkhūnaṃ dhammaṃ sutvā dvayena³ vūpakatṭho viharati kāyavūpakāsena ca cittavūpakāsena ca. so tathā vūpakatṭho viharanto taṃ dhammaṃ anusarati anuvitakketi.

2. yasmim samaye bhikkhave, bhikkhu yathā⁴ vūpakatṭho viharanto taṃ dhammaṃ anussarati anuvitakketi. satisambojjhaṅgo tasmim samaye tassa bhikkhuno āraddho hoti. satisambojjhaṅgaṃ yasmim samaye bhikkhu bhāveti, satisambojjhaṅgo tasmim samaye bhikkhuno bhāvanāpāripūriṃ gacchati. so tathā sato viharanto taṃ dhammaṃ paññāya pavicinati pavicarati parivīmaṃsamāpajjati.

¹pāhaṃ - machasaṃ.

²bahupakāraṃ - syā.

³dvayena vūpakāsena vūpakatṭho - machasaṃ.

⁴tathā - machasaṃ, syā.

3. yasmiṃ samaye bhikkhave, bhikkhu tathā sato viharanto taṃ dhammaṃ paññāya pavicinati pavicarati parivīmaṃsamāpajjati, dhammavicayasambojjhaṅgo tasmīṃ samaye tassa bhikkhuno āraddho hoti. dhammavicayasambojjhaṅgaṃ yasmiṃ samaye bhikkhu bhāveti, dhammavicayasambojjhaṅgo tasmīṃ samaye bhikkhuno bhāvanā pāripūriṃ gacchati. tassa taṃ dhammaṃ paññāya pavicinato pavicarato parivīmaṃsamāpajjato āraddhaṃ hoti viriyaṃ asallīnaṃ.

4. yasmiṃ samaye bhikkhave, bhikkhuno taṃ dhammaṃ paññāya pavicinato pavicarato parivīmaṃsamāpajjato āraddhaṃ hoti viriyaṃ asallīnaṃ, viriyasambojjhaṅgo tasmīṃ samaye bhikkhuno āraddho hoti. viriyasambojjhaṅgaṃ yasmiṃ samaye bhikkhu bhāveti, viriyasambojjhaṅgo tasmīṃ samaye bhikkhuno bhāvanā pāripūriṃ gacchati. āraddhaviriyassa uppajjati pīti nirāmisā.

5. yasmiṃ samaye bhikkhave, bhikkhuno āraddhaviriyassa uppajjati pīti nirāmisā, pītisambojjhaṅgo tasmīṃ samaye bhikkhuno āraddho hoti. pītisambojjhaṅgaṃ yasmiṃ samaye bhikkhu bhāveti, pītisambojjhaṅgo tasmīṃ samaye bhikkhuno bhāvanā pāripūriṃ gacchati. pītimanassa kāyopi passambhati cittampi passambhati,

6. yasmim samaye bhikkhave, bhikkhuno pīmanassa kāyopi passambhati, cittampi passambhati, passaddhisambojjhaṅgo tasmim samaye bhikkhuno āraddho hoti. passaddhisambojjhaṅgaṃ yasmim⁵ samaye bhikkhu bhāveti, passaddhisambojjhaṅgo tasmim samaye bhikkhuno bhāvanā pāripūrim gacchati. passaddhakāyassa sukhaṃ hoti sukhino cittaṃ samādhīyati.

7. yasmim samaye bhikkhave, bhikkhuno passaddhakāyassa sukhino cittaṃ samādhīyati, samādhisambojjhaṅgo tasmim samaye bhikkhuno āraddho hoti. samādhisambojjhaṅgaṃ yasmim samaye bhikkhu bhāveti, samādhisambojjhaṅgo tasmim samaye bhikkhuno bhāvanā pāripūrim gacchati. so tathā samāhitam cittaṃ sādhuṃ ajjhupekkhitā hoti.

8. yasmim samaye bhikkhave, bhikkhu tathā samāhitam cittaṃ sādhuṃ ajjhupekkhitā hoti. upekhāsambojjhaṅgo tasmim samaye bhikkhuno āraddho hoti. upekhāsambojjhaṅgaṃ yasmim samaye bhikkhu bhāveti, upekhāsambojjhaṅgo tasmim samaye bhikkhuno bhāvanāpāripūrim gacchati.

9. evaṃ bhāvitesu kho bhikkhave sattasu bojjhaṅgesu evaṃ bahulīkatesu satta phalā sattānisamsā pāṭikaṅkhā. katame satta phalā sattānisamsā: diṭṭheva dhamme

⁵tasmim - machasaṃ, syā.

pts page 069

pts page 070

paṭigacca⁶ aññaṃ ārādheti. no ce diṭṭheva dhamme paṭigacca aññaṃ ārādheti, atha maraṇakāle aññaṃ ārādheti. no ce diṭṭheva dhamme paṭigacca aññaṃ ārādheti, no ce maraṇakāle aññaṃ ārādheti, atha pañcannaṃ orambhāgiyānaṃ saṃyojanānaṃ parikkhayā antarāparinibbāyī hoti. no ce diṭṭheva dhamme paṭigacca aññaṃ ārādheti, no ce maraṇakāle aññaṃ ārādheti, no ce pañcannaṃ orambhāgiyānaṃ saṃyojanānaṃ parikkhayā antarāparinibbāyī hoti, atha pañcannaṃ orambhāgiyānaṃ saṃyojanānaṃ parikkhayā upahacca parinibbāyī hoti. no ce diṭṭheva dhamme paṭigacca aññaṃ ārādheti, no ce maraṇakāle aññaṃ ārādheti, no ce pañcannaṃ orambhāgiyānaṃ saṃyojanānaṃ parikkhayā antarāparinibbāyī hoti, no ce pañcannaṃ orambhāgiyānaṃ saṃyojanānaṃ parikkhayā upahacca parinibbāyī hoti, atha pañcannaṃ orambhāgiyānaṃ saṃyojanānaṃ parikkhayā asaṃkhāraparinibbāyī hoti.

10. no ce diṭṭheva dhamme paṭigacca aññaṃ ārādheti, no ce maraṇakāle aññaṃ ārādheti, no ce pañcannaṃ orambhāgiyānaṃ saṃyojanānaṃ parikkhayā antarāparinibbāyī hoti, no ce pañcannaṃ orambhāgiyānaṃ saṃyojanānaṃ parikkhayā upahacca parinibbāyī hoti, no ce pañcannaṃ orambhāgiyānaṃ saṃyojanānaṃ parikkhayā asaṃkhāraparinibbāyī hoti, atha pañcannaṃ orambhāgiyānaṃ saṃyojanānaṃ parikkhayā sasaṃkhāraparinibbāyī hoti,

⁶paṭikacca - machasaṃ, syā.

11. no ce diṭṭheva dhamme paṭigacca aññaṃ ārādheti, no ce maraṇakāle aññaṃ ārādheti, no ce pañcannaṃ orambhāgiyānaṃ saṃyojanānaṃ parikkhayā antarāparinibbāyī hoti, no ce pañcannaṃ orambhāgiyānaṃ saṃyojanānaṃ parikkhayā upahaccaparinibbāyī hoti, no ce pañcannaṃ orambhāgiyānaṃ saṃyojanānaṃ parikkhayā asaṃkhāraparinibbāyī hoti, no ce pañcannaṃ orambhāgiyānaṃ saṃyojanānaṃ parikkhayā saṃkhāraparinibbāyī hoti. atha pañcannaṃ orambhāgiyānaṃ saṃyojanānaṃ parikkhayā uddhamsoṭo hoti akaniṭṭhagāmī. evaṃ bhāvitesu kho bhikkhave, sattaṃ bojjhaṅgesu evaṃ bahulīkatesu ime satta phalā sattānisamsā pāṭikaṅkhāti.